


GIGGLMOO



Mensch bleim

Texte

Inhalt

Aungbligg	3
Dodaal digidaal	4
Ebbe un Fluud	5
Ess Gscheiderlä	6
Froochezeichn	7
Glabsdersna	8
Iech bin so frei	9
Jedn Dooch a bissla mehr	10
Mensch bleim	11
Su glaa	12
Umdrehä	13
Weidbligg	14
Wenn de Schdurm si gleeched hodd	15
Zammhaldn	16
Zwaa Donna Globabier	17

Aungblig

Text und Musik: Martin Plentinger

Wenn ich so manchn Auchnblig fodd gehn seh
Do dengg ich mä: Zeid - bleib hald schdee
A su kennäds bleim, wall etz is grod schee
Ach, Zeid, kumm geh, bleib hald schdee!

Doch dann is scho widdä ä Wochn rum, un di Dooch, flieng an miä blous su vorbei,
ständi bisd mid irchendwos beschäftichd, machsd d'än Schdress un hängsd di furchboar nai
Un dann is a scho widdä Weihnachdn – es läffd der erschte Jahresrückblick
un ich deng mä blous, des kann doch goar ned sei un schau selber verdraamd zurück:

Un do siech i mi sitzn am Schdrand schau wäi di Welln kummä
und wäis dann a widdä gäih
ich schdegg di Fäiß in Sand un schau zum Himmel
un ich hob nix zu duu – ach des is schäih!

Ach Godd, was woarn des für zwaa Waggerlä, un des is a goar no ned so lang her,
do hob is all zwa in der Graxn rum drohng – allmächt was woar des schwer
Vorbei sin die Joahr mit dem Kinderglügg, mid Windl un Baggi un Gschrei
aus Kinder wern Laid un so is dann die Zeid, eingtli a vill zu schnell vorbei

Haid kummd a junge starke Frau zu unsrer Hausdür nei
Der junge Mann hod gsehng die halbe Weld
Un wenn mir dann beinander hoggn und drinkng uns vom Lebm erzähl
Dann waaß ich, was wergli zähld.

Wenn ich so manchn Auchnblig fodd gehn seh
Do dengg ich mä: Zeid - bleib hald schdee
A su kennäds bleim, wall etz is grod schee
Ach, Zeid, kumm geh, bleib hald schdee!

„I hob ka Zeid“ und: „Na, heid is grod schlecht“ und: „Ach Godd, dazu bin ich ned kummä“
Mid lauder so Schbrüch hob ich mir manchn Dooch selber scho die Ohrn vull gsungä
Dabei is des alles glohng, wall jeder Dooch is gleich lang un läfft gleich schnell dahie
un was du dann mit deine Stundn machsd, des hosd du in deiner eichenen Regie!

Wall aans mussd wissen, irchendwann, do bleibd die Zeid dann schdee,
danoch kummd dann blous nu die Ewichkeid.
Do hosd dann für alles, was ned ins Leebm nei bassd hod
Vielleichd ja doch dann jede Menge Zeid.

Doch dann dengg ich, wenn iech scho fast am Himmelsdoor schdeh
Ach Zeid bleib etz ned schdee, kumm gäih weider,
grod etz bassd's ned, ich brauch nu Zeid, ich will etz nu ni gäih,
ach Zeid, kumm bleib etz nu ni schdee.
ach Zeid, kumm bleib etz nu ni schdee
ach Zeid, kumm bleib etz nu ni schdee.

Dodaal digidaal

Text und Musik: Martin Plentinger

Ich bin dodal digidal, mei Home is völlig Smart
Mei Kühlschrank Kaffd etz für mich ei, un checkt mein Biervorrat
An Fernseher brauch ich nimmer bei mir wird blous nu gestreamt
do kann ich etz jeds Gschmaarri sehng, am besten noch gebeamt
Alexa hört mir immer zu und widerspricht mir nie
Doch etza is wo's schlimms basierd, mei Welan des is hie:

Ich glaab mir homs mei Cloud geglaud
Es geht nix mehr, mei Akku is leer,
I bin so vernetzt, un es is wie verhext
Mei Handy is hi, will etz a Ei Die,
Etz is a no der Speicher voll - na Doll!!!
un des is mir ned egal, wall ich bin: dodaal digidaal!

Dei Daten sollst du schützen, dass kanner vu Dir was gricht
Ich hab aber goar kanne Zahl'n in mein scheener Gesicht
Drum stell ich's etz auf Instagramm und hängs ins Gesichtbuch nei
su greich ich tausend Follower und bin voll dabei!
Doch irchendwos des stimmd ned, mei Cybercrowd die schdreigt,
wall vu meine ganzn Freind, mich kaaner gliggd und leigt!

Ich glaab mir homs mei Cloud geglaud
Es geht nix mehr, mei Akku is leer,
I bin so vernetzt, un es is wie verhext
Mei Handy is hi, will etz a Ei Die,
Etz is a no der Speicher voll - na Doll!!!
un des is mir ned egal, wall ich bin: dodaal digidaal!

Mei Zahnarzt is entsetzt: „Sie ham an blauer Zahn“
Ka Wunder wall ich ärbert mit Bluetooth bei mir dahaam
Un mei Psychater sacht zu mir, „Sie sin fei schizophoren“
vor lauter „Standort teilen“, wissens nimmer wo sie stehn
Un aa mei Herzfrequenz, die steht bei 1 1 0
Wall mei Algorithmus, der haut mich fast vom Stuhl

Vor unsre grüna Nachbarn frouchd mich der Bou am Zaun
ob ich ned Zeid hob um mit ihm a Baumhäisla zu baun
do schau ich ganz verdutzt, grad wäi der letzte Depp
und denk kurz noch uns soch dann no: „Dofür hab ich ka Äpp“
Do grinst miech doch der Rotzlöffel, middn nei ins Gsichd,
un sachd zu mir, i hobs kaum glaabd, hob ned gwussd wäi ma gschichd:

„Ich glaab dir homms dei Hirn geklaut
Bei dir geht nix mehr dei Kupf is leer,
du hosd doch „Apple“ auf die Aung
machsd „Windows“ auf zum Frischluft saung
Bei Dir is doch der Speicher voll!“ - I denk mer no: Na doll!
Dann is der Fregger rum ums Eck! - Egal – I bleib digidaal!

Ebbe un Fluud

Text und Musik: Wolfgang Mai

A naier Dooch schimmerd zwischer verwitterda Felsn
A laus Lüfdla wehd vo irchndwo her
Iech hogg do, schmegg blödzli Salz auf di Libbm
In de warman Briesn, do riech iech ess Meer

Türkisfarbms Wasser, glosloar un warm,
Verschdeinerda Fisch fanga widder o zu leem
Mooch ja sei un Frangn lichd heid om Sambesi
Obber villeichd mornig scho lichds widder om Meer

Horch, kumm, geh zu, loss einfach guud sei,
Nur de Wind waas vo wo un wohierer wehd
schau wie di Wolng ziehng, gibb dei Herz frei
Schau, ess Meer kummd un s'Meer gehd

Horch, kumm, geh zu, loss einfach guud sei,
Alles kummd un gehd, alles werd widder guud
Dreh di im Kreis, danz aufm Wasser
Loss di dreibm midd Ebbe un Fluuds

Demm Dooch falln di Aung zu, mir dagehng gengans auf
Om Himml Lichd längsd vergangner Zeid
Wies ders drehsd un wendsd, alles nimmd sein Lauf,
A naia Weld kummd mornig, di vo edzerd gehd heid

Amoll ohm, amoll undn, amoll grodaus, no widder zrüg
Auf deem Weech schauglds diech hie un heer
Loss di dreibm, schaugl mied, dreff dei Glügg
Schdemmsd di dagehng, dann ershd werds schwer

Horch, kumm, geh zu, loss einfach guud sei,
Nur de Wind waas vo wo un wohierer wehd
schau wie di Wolng ziehng, gibb dei Herz frei
Schau, ess Meer kummd un s'Meer gehd

Horch, kumm, geh zu, loss einfach guud sei,
Alles kummd un gehd, alles werd widder guud
Dreh di im Kreis, danz aufm Wasser
Loss di dreibm midd Ebbe un Fluud

Horch, kumm, geh zu, loss einfach guud sei,
Alles kummd un gehd, alles werd widder guud
Dreh di im Kreis, danz aufm Wasser
Loss di dreibm midd Ebbe un Fluud

Ess Gscheiderlä

Text und Musik: Martin Plentinger

Neilich afm Cämbingbladz rangschier ich lässich ei,
Wall do is schee, do schdell ich hie mei Bedd,
Da schdehd er do, ganz braun gebrannnd, Goldkeddla ummän Hals
Und sachd zu mir „Hald, so gehd des fei nedd!“
Er fuchdld wild und wingd mi nei, Erfahrung is hald alles,
Er kennd si aus, blouß er waas wie des gehd,
Do grachds a scho etz is zu schbäd, iech hob den Pfoften gsehn,
blous der „Wichdich“ hod ned gwussd, dass der do schdehd

Su a Gscheiderlä, des is einfach wichdich,
Ohne 's Gscheiderlä mach ich einfach nix richdich,
Drum bin ich froh, wenn's Gscheiderlä glei immer nebm dro schdehd,
Wall ohne Gscheiderlä do bleib ich bleed.

Ich schdeh vur anner Dafl, do schdehd groß „INFO“ drauf,
Wahrscheinlich kann ich mich da informiern!
Ich les: Der Bägger hod morgn zu, un a Bus fährt kaaner mehr,
Abber neebmdran dennäers Fahrrad rebariern.
„Beim Bägger griengs fei nix morgn, un a Bus der fährt heid nimmä“
Quägd newer mir aff amoll su a Moo.
„Dafier kenners ihr Fahrrad um die Eggn rebariern“
Ich hädds ned gwusst, ach Godd, wos bin ich froh!

Su a Gscheiderlä, des is einfach wichdich,..

Do hogg mid an schdeifn Hals in an Waddezimmer,
De SchädL brummd un mir is ned zum Lachn,
da frochd mei Nachbar indressiert, was iech denn schließlich hädd,
Wall er hodd a so manche Sachn,
Bei ihm is alles schlimmer, er waas wovu er redd,
Er is ja schließlich jede Wochn do
Un alles wos der Doggder waas, des waas er blouß vu ihm!
Do schleich iech mich ganz leis widdä davo.

Su a Gscheiderlä, des is einfach wichdich,..

Es Gscheiderlä gibsd ieberall auf derer großn Weld,
Des waas alles und dudd a nix vergessn,
Ob Klugscheiser, ob Schlaumeier, oder Besserwisser,
Es hod di Weisheid mid der Schöbfkelln gfressn.
Ganz wurschd wie mä zu denna „Neinmolgluuchn“ sachd,
Im Südn, Noddn, Osdn oddä Wesdn:
Aff frängisch glingt ganz liebevoll und ohne Aggression,
a „Gscheiderlä“ hald immer no om Besdn.

Su a Gscheiderlä, des is einfach wichdich,..

Froochezeichen

Text und Musik: Wolfgang Mai/Martin Plentinger

Die Strossn leer, es iss so still, blous Veechl zwitschern keck
als ob a unsichtbare Hand die Weld onghaldn hätt
Ham glabbd, des gäihd su weider, das alles machbar wär
ham alles selber in der Händ un nix is uns zu schwer.

Obber nix iss gwies, blous aans is gwies, dass nix mehr bleibd wies woar
wall etdz scho alles anders is, als vur an halbn Joahr

Was bleibt sin Fraachezeichen, Fraachezeichen,
die Andword kennd scheinds nedd amoll der Wind
Fraachezeichen, Fraachezeichen,
wall mir begrenzde Menschenkinder sin

Ham dengd mir sin die Grässdn und Stärgsdn in der Weld
un jeds Broblem is lösbar, mid an Haufn Geld
Eds stemmä do un schau'n rechd bled, midn Rüggn an der Wand
un mergn grad ganz deidlich, mir ham nix in der Hand

Nix is gwies, blous aans is gwies, dass nix mehr bleibd wies woar
wall etdz scho alles anders is, als vur an halbn Joahr

Was bleibt sin Fraachezeichen, Fraachezeichen,
doch Andwordn braung mir, für dich mei Kind
Fraachezeichen, Fraachezeichen,
ich hoff, dass ich für mich a Andword find.

Nix is gwies, blous aans is gwies, dass nix mehr bleibd wies woar
wall etdz scho alles anders is, als nu vur an halbn Joahr

Um alles zu begreifm, um alles zu versteh
Missersd außerhalb vom allem, ieber allem steh
Zeich mer ahn, an ahnzing bloss, der alles iebersichd
Mier stengan middndrin im Dungal, un ahna bloss ess Lichd

Nimm diech in Achd, wenn ahner kummd, un der di Weld erglärd
Du wassd, der waas nedd mehr wie du, lichd wohrscheins a verkehrd

Was bleibt sin Fraachezeichen, Fraachezeichen,
die Andword kennd scheinds nedd amoll der Wind
Fraachezeichen, Fraachezeichen,
wall mir begrenzde Menschenkinder sin
Was bleibt sin Fraachezeichen, Fraachezeichen,
doch Andwordn braung mir, für dich mei Kind
Fraachezeichen, Fraachezeichen,
ich hoff, dass ich für mich a Andword find.

Glabsdersna

Text und Musik: Wolfgang Mai

Dass Geld di Weld regiern soll, dess gild scho lang ned mehr
Heid regiern Brogramme, gedrimmd auf immer schneller, immer mehr
Finanzgriech-Algorhydhma sin di naia di Herrn dä Weld
Di Geldgriechs-Generäle boodn wie Ongl Dagoberd im Geld

Während mier nu vornehm vendiliern, wie konnern dess bloß sei
Lachn die siech frech ins Feisdla, kibbn siech denn Schampus nai

Glabsdersnaa - Dinger gibbds, di gibbds ned
Glabsdersnaa - dess wennsd heersd, dess baggsd ned
Fei alles wohr - dess alles glabsd ned
Wergli wohr - Do langsd dä bos ons Hirn

Du konnsd kaan Schridd mehr machn, s'werd regisdriert un archiviert
A jeder Schiess, den'sd fohrn lässd, digidal analysiert
Als ob dess ned scho gnuuch wär, so schliesd siech no dä Greis
Mier lossns ned bloß zu, gehm selber alles breis

Di Doodsammler wissen alles, wosd gessn hosd un wie dei Schduhl heid wor
Irchndwann kennans dann Gedangn lesn, schreibm dä wiesd zu lebm hosd vor

Glabsdersnaa - Dinger gibbds, di gibbds ned
Glabsdersnaa - dess wennsd heersd, dess baggsd ned
Fei alles wohr - dess alles glabsd ned
Wergli wohr - Do langsd dä bos ons Hirn

Dess alles iss so ungläublich, do kummsd ned selber drauf
So schräch, gnadnlos danebm, do hauds dä voll denn Vochl naus
Dess kommer kaam erzähl, des nimmd dä kaaner ab
Dädsd ders selbst erfindn, no fiererdns diech sofodd ab

Biss mer all dem auf di Schlichn kummd, maahnd mer eh, ess iss bloß draamd,
Irchndwann dann a bees Erwachn, obber no hamm die scho voll abgrahmd

Glabsdersnaa - Dinger gibbds, di gibbds ned
Glabsdersnaa - dess wennsd heersd, dess baggsd ned
Fei alles wohr - dess alles glabsd ned

Iech bin so frei

Text und Musik: Wolfgang Mai/Martin Plentinger

Iech frei mi so, dass Wolgn gibbd am Himml,
frei mi wennis reengd un manchmol sugor schneid
Iech frei mi a, wenn alles widdä grün wird
un Biena in die Heggrosn wimmln

Wenn Zeisich zwidschern un un die Käfer brummä,
wennsd Muggn baddschn konnsd un Hummln summä
Ohm drohm am Himml fährt a Heißluftballong
wenn Schwalbn schwirrn un Fischla goar nix sohng.

Iech frei, iech frei, iech frei mi frei
ganz ohne Grund und einfach so
Iech frei, iech frei, iech frei mi frei -
einfach so, des machd mi frei!

Iech frei mi in der Nachd am helln Mond
on jedm Dooch wenn drohm di Sunnä drohnd
auf Frühling, Sommer, Herbst, folchd dann der Winder,
so wunderbor, do iss a Sinn dahinder

Di Gscheiderla di wolln davu nix wissen
wer blous midn Kubf lebt, lebt ziemli beschissen
Iech frei mich einfach un des machd an Sinn
am massdn freids mi, dass i einfach bin!

Iech fühl mi grad su aafgrammd o un leichd
ess Haus is kehrd un pudzd bei mir dahamm
des sin su Dooch, do denk ich mir: Vielleicht
kern Erd un Himml irchendwie doch zamm
Do konnsd in andern a als Menschn sehng
un so wie du diech selber mogsd,
im andern mehng

Iech frei mich aa, dess is des scheene dro
dass iech mich goar ned einfach so ans Freiä gweehna ko
drum bleibd für mich su vill ganz einfach nei
Iech frei mi einfach, dass iech mich frei!

Iech frei, iech frei, iech frei mi frei
ganz ohne Grund und einfach so
Iech frei, iech frei, iech frei mi frei -
einfach so, iech bin sof rei!

Jedn Dooch a bissla mehr

Text und Musik: Wolfgang Mai

Iech ferchd mi nedd vorm Älderwerrn
Iech laaf nedd vor mer selbsd davon
Solang iech gscheider wer, woss lern
Wachsn schdauna, lachn kann
A wenn di aldn Gnochn schdöhna
Di Baaner ofd nedd wolln wie's solln
Konn iech miech doch rechd guud dro gwöhna
Schöbfd mai Seel doch ausm Volln

Midd jeedm Dooch a Stügglä mehr
Jedn Dooch a bissla mehr

Schdeichn Berch nauf, schdeil un beschwerli
Jeder Schrid d kosd a Schdügg Krafd
A scheener Weech, wenn a manchmoll gfährli,
Obber nimmer lang, un iech hobbs gschaffd
Mai Bligg schdreichd ieber alla Wipfl
Immer heecher naus beim Weidergehn
Om End vom Weech, ohm drohm om Gipfl
Konni dann am weidsdn sehen

Midd jeedm Dooch a Stügglä mehr
Jedn Dooch a bissla mehr

In der Sanduhr siggsd wie jeds glaa Kücherla
Unaufhaldsam sein Weech nunderrolld
Di Zeid verrinnd un di Sandkörnla
Verwandln siech in Gold

Ob arm, ob reich, jung odder ald,
Dess gschdehd si bloß kahner gern ei
Konns sei, dass diech ess Schiggsal kralld
Jeder Dooch kann der ledzde sei
Mach bloss nu dess, woss iech fier richdi
un sinnvoll hald, verdu ka Zeid
Woosd saggsd un dussd im Edzerdla iss wichdi
Iech geh denn Weech, den iech endscheid

Midd jeedm Dooch a Stügglä mehr
Jedn Dooch a bissla mehr
Midd jeedm Dooch a Stügglä mehr
Jedn Dooch a bissla mehr

Mensch bleim

Text und Musik: Wolfgang Mai

Engl hamm kanni Flüchl, wozu a sollns fliehng?
Schdengan middn im Leem, wo's fesd auf ihri zwaa Baaner schdehng
Menschn werrn Engl, wenss Menschn bleim
Sinn ofd runzlerd un glaa, a groß Herz innadrin
Un dess fei nedd bloß zum Schein

Si leem nedd im Schaddn, sonna siech nedd im Lichd.
Sinn do, wenn ka Hahn noch de krähd, ka Sau midd de schbrichd
Wennd auf ahn driffsd, no häld di Uhr o,
Di Zeid bleibd schdeh, fier an Momend, a Ewichkeid
Du riechsd in Mornng, siggsd Lichd om Horizont

Si schwafln nedd rum, langa lieber gscheid no
Si bleim dabfer schdeh, a wenn de Schdurm blässd un renna vor nix davo
Si liebm di leisn Döne, haldn si lieber zrick
Im Glaan sehngs dess Große, un braung ka Sensation fier an Kigg

Si ziehng diech ausm Wasser, wennd om Absaufm bisd
Reing der ihr Händ, bedingungslos, ohne Hinderlisd
Wennd auf ahn driffsd, no häld di Uhr o,
Di Zeid bleibd schdeh, fier an Momend, a Ewichkeid
Du riechsd in Mornng, siggsd Lichd om Horizont

Si schdengan in kamm Gschichdsbuch drin
Kahner schreibd ihri Gschichdn auf
Ka Schdrossnschild drähd ihrn Nooma
Auf Briefmargn kummans nedd drauf
Ka Dengmool werd endhülld
Ka Heldnsaga gschriem
Si sinn un bleim di wohrn Heldn, wall
si sinn Menschn bliem

Si brülln nedd bleed rum, sondern versuhng zu Verschdeh
Sie balln kanni Fäusd, machn kahn glaa, um selber gross dozuschdeh
Haldn siech fier nix bessers, sinn zärdl, nedd barsch,
Walls wissn ohm drohm, om hechsdn Drohn hoggsd a bloß auf deim Bobbers

Liggsd om Boodn, beung se si nunder, helfm de widder auf
Schreim de ka Rechnung, haua ne'dd a nu midd drauf
Wennd auf ahn driffsd, no häld di Uhr o,
Di Zeid bleibd schdeh, fier an Momend, a Ewichkeid
Du riechsd in Mornng, siggsd Lichd om Horizont

Su glaa

Text und Musik: Martin Plentinger

Mei suu glaa, sin deine Händla un so winzich, die Finger dro
Konnsd nu goar nix, richtich haldn, bisd nu goar ka starger Mo
Doch du werst sehng, fast wie vu selber, wern di grässer, bleim ned su glaa
un wos du dann amoll anbaggst, des bestimmst du ganz alla

Mei su glaa, sin deine Fäiβla, konnsd nu goar nu ned draaf steh
Konnsd blous in die Lufd nei schdrambln, aber nonned wergli geh
Des wird sie ändern, wall die wern länger, do konnsd du goar nix dro drehn.
doch wohie und welche Weech du gehst, des mussd du dann selber sehng.

Mei su glaa, is nu dei Göschla, un do drin sin a nu kanne Zäh
Konnsd blous gnaunzn un a weng gaatschn, aber ka Wodd, des ich versteh
Die Wörder lernst du, vu ganz vu selber, do brauchst du ka Buch dazu
Doch wos du dann amoll von dir gibst, des entscheidst dann blous nu du.

Ja su glaa is jeder Anfang, alles fängt ganz winzich o
Un so manches wächst vu ganz allaa, do schaut dann einfach zu
Aber werns richtich groß und wichtich werd, des soch ich dir mei Bu,
do konnsd ned blous draf waddn, wall do brauchts immer diech dazu!

Etz sitz i do, su neber Dir, du bist su glaa un ich bin grässer
Doch lass der sohng, des is egol, desweng bin iech nu lang ned besser
iech frei mi so, konns goar ned sohng, etz bisd du do, in dera Weld,
doch iech was aa, des werd ned leichd, iech hädd da gern a bessre bschdelld.

Mir glaam no immer, mir wärn di gressdn, dabei sin mir, suu glaa mit Hut
Wall des wos iech dir hinderlass, naja des iss hald ned so gut.
Doch des wird andersch, werst scho sehng, wall iech glaab, ihr machd des besser
Des wünsch ich dir, mei glaaner Zwetschger, doch etz werd du erscht amoll gresser!

Wall su glaa is jeder Anfang, alles fängt ganz winzich o
Un so manches wächst vu ganz allaa, do schaut dann einfach zu
Aber werns richtich groß und wichtich werd, des soch ich dir mei Bu,
do konnsd ned blous draf waddn, wall do brauchts immer diech dazu!

Drum sing mit mir etz a Schuwiduu un a schuwiduwidaa
Wall des Lied des ich grod für dich sing, des is nu ziemlich glaa
Blous wenn du mit mir singst a schuwiduu un a schuwiduwidaa
Dann werd des klaane Lied ganz schnell, viel gresser mit uns zwaa!

Umdrehä

Text und Musik: Martin Plentinger

Weider, immer weider, vor mir des große Ziel
ganz wurschd wie schdeil de Weech is, do werd mir nix zuviel
ka Rüggsichd af Verlusde, blouß wer naafkummd is der Held
un a halber Weech is goar nix, wos ma zeing ko un wos zähld.

Aber wos wens anders kummd, wenn die Krafd ausgäihd,
wenn die Sichd vernebelde is, dai Fuß am Abgrund stäihd,
wenn`s gfährlich werd un wenn di Angsd in jede Ader treibd,
wenn jeder Blan am Ende is? Des aanziche wos bleibd is

Steh bleim – umdrehä – un dann di Richdung drehn,
des is vill mehr als einfach blous zurügg
Wer Mud had umzudrehä, kann aa di andre Seidn sehng,
un find an neier Weech, an neier Bligg!

Weider, immer mehr, mir sinn nie wergli sadd,
un wer uns dann zu deier is, den setzn mir Schachmadd.
Was machbar is, des mach mer, is ganz wurschd ob mir des braung
wall wos mer homm, des hommä, dieGier schbirchd aus die Aung.

Aber was, wenn's andersch kummd, wenn uns die Lufd ausgäihd,
wenn vu Hitzn un vu Schdurm, die Weld in Abgrund dräihd,
wenn im dodal versaudn Meer, der ganze Schrodd versingd?
Vielleichd fäng aaner an zu frong, wos uns des Ganze bringd?

Steh bleim – umdrehä – un dann di Richdung drehn..

Besser, immer gscheider, iech waas einfach wäis gäihd,
der ander, der is eh a Debb un wor scho immer bläihd!
Den brauch i nedd, den will i ned, der kann ma gschdulln bleim,
dem homms doch eh des Hirn rausbiggd, der soll si doch blous schleing.

Aber was wenn mehr draus werd, wall Kriech fängd oh mit Schdreid,
un wenn vor lauder Woud un Hass ball nix mehr ieblich bleibt,
wenn Käpf zammgnalln un kaaner mehr an Zendimeder weichd,
un Blindheid grank un gfährlich machd und uns des Leebe vergeichd

Wer umdrehd, der gibd scheinbor auf un is in unserer Weld
a Luuser un a Feichling, und ganz gwieß ka Held
Aber aa Geld und Ehrgeiz, Machd un Ruhm, stehn irgendwann vurm AUS
Un blous wer Mud had umzudrehä, der kummd a widder raus!

Steh bleim – umdrehä – un dann di Richdung drehn,
des is vill mehr als einfach blous zurügg
Wer Mud had umzudrehä, kann aa di andre Seidn sehng,
un find an neier Weech

Weidbligg

Text und Musik: Martin Plentinger

Ich schau in die Weidn, der Wind schdreichd übers Feld, der Weizen schaugelt sanft hin un her,
a Rehla spitzt grod raus, daucht dann widdä ab, im unendlichen Feldermeer.
Hinderm Horizont, is lang nu ned Schluss, do hindn ganz am End vom Himmelszeld
Un wäi die Sunnä langsam hinder di Baam verschwind, fraach ich mich: Wem gehärd eigentli di Weld?

Wem is des blous eigfalln, an Grenzstaa hie zustelln, an Zaun um a Stügg Erdn rum zu baun,
un einfach zu behauptn: des gherd etz mir allaa, wer do ned hergherd soll abhaun!

Iech schau iebers Meer, der Wind bläst mer ins Gsicht, a winzigs Schiffla fährt do ganz am Rand
Es siecht so aus, als obs etz glei do hinten nunder fällt, am End vom Meer do bei der Wolknwand
Godd sei Dank is unser Erdn einfach kuchelrund, drehd sie im Kreis im Weltallbalett.
Doch zu vill Leid glaam immer nu, die | Erdn is a Scheim, wäi a Pizza, gnusprich, deftich, legger | fett.

Jeder beißd sei Stüggler runder, des was ihm hald schmeckt, denkt ned noch, verputz es mit Genuß
Bis aaf amoll der Deller ganz leergfressn is aff amoll is nix mehr do, no is Schluss!
Vill zu vill Scheiglabben laafm durch die Weld, bei bis zu minus zwanzich Dioptrin
Do sixt nadirlich nimmer übern Rand vum Deller naus, un in die Weidn schauä machd do kann Sinn

Weidbligg, Weidbligg iss vill mehr als blous schnell in Hunger stilln
mit Weidbligg, mit Weidbligg fährst du ned einfach auf der lezdn Rilln

Iech liech im Gras schau in die Nacht, die Sternlä fungln schee,
ich frooch mich wie weid die Weidn gehn
ob do nu wos kummd, do hinderm Sternlazeld,
des kann ich mid meine Aung ned sehng

Do zwingerd mir mit einem mol a Sternla freindli zu
un sachd zu mir: Du klaaner Menschenbou
du mechersd gern a Riese sei un in die Weidn sehng.
Do saach iech dir des ahne blouß derzou:

Iech sehe was was du ned sichsd, des konnsd mit kaane Aung,
aa Du ned sehng, beim besdn Willn.
Weidbligg braucht Bescheidenheit, a Herz un ganz vill Hirn,
aber ganz bestimmt ka Fernglos un ka Brilln!

Wenn de Schdurm si gleeched hodd

Text und Musik: Wolfgang Mai/Martin Plentinger

Wenn der Schdurm sich ersched mol gleeched hod, un gibbd langsam widder ä Ruh
Un mir rausgrabbeln nach dera Welt-Karambolage
unser Herz wird ersched amol greinä - un drodz allem is a Seehng
wall mer uns unbändich fraiä dass mer ieberhabds nu leem
Ka Mensch is uns mehr fremd, des Zammsein is zurück
Mei Freind is a nun do, wos für a Glügg.

Wall mir hobm so vill verlurn, des werd uns etz ersched kloar
Edz wern mä endlich gscheider, denkn drieber noch
Alle is gleich dreggerd gangä, aaf kaan schaut mehr neidisch noo.
un kanner sachd mehr: „Mir doch worschd“ un „wos geiht miech des o“,
Dann werd wichdi, wos alle gherd und ned blouß mir allaa
und jeder is aaf amoll fiern andern immer da

Mir wern kapiern, dass unser Leem annern seidnä Fodn hängt
mir gräing a Gefühl für alle Leid, a wenss schon gangä sin
drum fehld uns aa der alde Mo, vurm Bohnhof is er gsessn
ka Ahnung wi er ghaasn hod, wolld Geld bluos fier a Essn
Vielleichd wos ja der liebe Godd, blouß mid aner Masgn
gfroochd hod nern kaaner, woar hald ka Zeid

Do erleem mer dann alle a Wunder, a rießigs Gschenk
walls Leem af amoll mehr wert is, wäi jeder Hauptgewinn
ja wenn der Schdurm sich gleeched hod un mir uns widder sehng,
dann wünsch ich mir blous aans nu, läiber Godd,
dass mir uns widdä eikrieng, un menschliche Menschen wern
So wie´s amoll dei Draum wor - wergli woar, des wär su scheel!

Zammhaldn

Text und Musik: Wolfgang Mai/Martin Plentinger

Zammhaldn is des aanziche wos zähld,
wall zamm bleim die Weld beinander häld.
Zammhaldn is des aanziche wos gäihd,
wall allaa schausd auf Dauer ganz schee bläid.

Allaans kummsd du ned in die Weld, zwaa andre brauchsd dazou
und bei die erschdn Schriddlä brauchst a Hand
ohne an andern, der dich häld bisd masstns ganz verlurn
und stehsd allaans midn Rüggn an der Wand.

Zammhaldn is des aanziche wos zähld,
wall zamm bleim die Weld beinander häld.
Zammhaldn is des aanziche wos gäihd,
wall allaa schausd auf Dauer ganz schee bläid.

Allaa konnst du kaan Fußball schbilln un kaan Geboddsdoch feiern
Und ganz alla do baust du a ka Haus
und wenn die Weld in Bach no gehd un alles düster scheid,
do kummsd du ganz alla a nimmer raus.

Zammhaldn is des aanziche wos zähld,
wall zamm bleim die Weld beinander häld.
Zammhaldn is des aanziche wos gäihd,
wall allaa schausd auf Dauer ganz schee bläid.

Aff der Ärberd sachd der Schlaue, haubdsach mir allans gähds goud
und ich bin beim Chef a klaaner Subberstar
Doch die andern haldn zamm, wall sie wissn ganz genau,
morgn bisd der Debb und dann schdeihst ganz alaa.

Der Kleber babbd zwaa Drümmer zamm, die Tabedn hält mind Leim
der Mördl häld die Mauer, dass sie stehd .
Un so is des bei uns, damit mir ned auseinanderfalln,
braung mir den Kitt der Solidaridäd!

Solidaridäd iss des aanziche wos zähld,
wall zamm bleim die Weld beinander häld.
Zammhaldn is a Nehma un a Gehm
woll nur wer zammhäld, der werd a ieberlehm

Zwaa Donna Globabier

Text und Musik: Wolfgang Mai

Iech schbill nimmer mied, bin doch nedd bleed
Iech riech un spier dass di Weld undergehd
Iech waas nedd wann un wo genau
Obber iech geh auf Nummer Sicher un bau

An bombmsichern Bunger, leech fedda Vorräd o
Konservmnohrung, Pornos un a Dixi-Gloo
Schdobf di Regole voll midd Dosnbier
Un om Schluß do gönn iech mier

Zwaa Donna Globabier

Im Subbermargd do schauas un gloddn miech bleed o
Wall iech drooch schdablweis dess ganze Globabier davo
Di Drulla on de Kassn konns widder moll nedd glaam
Wenns miech vo weidm kumma sichd, no rollds scho midd di Aung

Iech deng mer, wer zuledzd lachd, der lachd om besdn
Di werrn scho sehng, wos nocherd bleim
Do kaaf iech nimmer ei, dess sooch iech dier fei
Dahamm un midd Exbress beschdell iech mier

Zwaa Donna Globabier

Hobbs Loocher voller Graffl bis unders Dach
Edz ward i auf denn großn Gnall reib mer di Händ un lach
Ihr werd eich nu wundern, ball kummd de Dooch
Om drölfdm Quardember iss soweid, gor ka Frooch

Wenn alles hi iss, alles Leem zershdörd
Bins iech alla, der hodd, woss all bedöhrd
De gressde Schaddz de Weld, der ghörd dann mier
Jedn Preis kann iech verlanga fier

Zwaa Donna Klobabier